

March 2, 2025

Aizawl

2:30pm

REGIONAL NEWS

WATERSHED YATRA

Hnahthial District-ah PMKSY 2.0 hnuaia Watershed Yatra Campaign chu Pu HD Lalpekmawia, Project Director, DRDO ho in Khawhri khua-ah nimin khan huaihawt a ni.

Project Director chuan central sawrkarin watershed yatra beihpui thlak a ngaih pawimawh thu sawiin, tuihna venhim te, leilung luangral tur ven te leh awmze nei zawka ruahtui khawl pawimawhzia te sawiin he beihpui thlak hi mipui kalkhawmin an hlawkpui theuh a beisei thu a sawi a ni.

Department of Land Resources (DoLR), Govt. of India bultumin ram pumah beihpui hi thlak mek a ni a, February ni 21 atangin Mizoramah pawh kalpui tan a ni a. District zawng zawngah beihpui thlak hi March ni 13 thleng hian kalpui zel tur a ni. PMKSY 2.0, Hnahthial district hian S. Chawngtui, Tarpho leh Khawhri te huam in project area a hnathawk tha mi pathumte hnenah chawimawina 'Watershed Margdarshaks' hlan bawk an ni. Campaign pual hian video thlir ho na, thingphun, banga rawng hmanga lem inziahsia, Quiz competition, hnam ziarang entirna leh tuihna venhimna kawnga thutiam sawihona hunte buatsaih a ni.

Watershed Yatra campaign hi ram pum huapin February ni 5 khan Union Minister for Agriculture & Farmers' Welfare, Shivraj Singh Chauhan chuan a hawng a. Hnahthial District ah pawh bialtu MLA Pu Jeje Lalpekhlua'n watershed yatra beihpui thlak hi a hawng a ni.

<><><>

KTP

Zirtawpni zan atanga tan, KTP Rorel Inkhawm vawi 11-na chu zanin hian a tiak ang.

KTP rorel inkhawm hi Chawnpui Kohhranin a thleng a. Zirtawpni zan kha palai lawmna inkhawm atan hun hmangin General Secretary report, Finance report leh Bial report khaikhawmna ngaihthlak a ni a, KTP Kumpuan hawn leh hlanna hun hman a ni bawk. Nimin (Inrinni) nileng kha Rorel inkhawm a ni a. Vawiin chawhma, chawhnu leh zana te vantlang Pathian biak inkhawm a awm ang a, zanain rorel inkhawm hi a tiak ang.

KTP Rorel inkhawm chuan kum 2026-27 Kumpuan Thupui atan 'Chhungril Takna' an thlang a. An thurel zingah bial tinah youth recreation centre (YRC) pual budget siam leh tur tihte, Hospital Charity Fund Pual, YRC Pual leh Chhawmdawlina pualin inkhawm thawhlawm lak tur tihte, ruihhlo do chhunzawm bakah khawlai rawngbawlina kalpui zui tur tihte a ni a. KTP Rorel Inkhawm vawi 12-na chu kum 2017 khian Kulikawn Kohhran-in a thleng dawn a ni.

KTP-ah hian bial 223, branch 907 leh a vaiin member nuai 1, sing 7, sang 7 leh 548 an awm mek a, mipa nuai khat 1, sang 7 leh 535 leh hmeichhia 70,013 an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

<><><>

MIZORAM-ASSAM TALKS

Ramri buai chungchanga Mizoram leh Assam sorkar official-te March thla tawp lama inbe turin ruahmanna an siam chu Mizoram lamin an la chhang lo.

Home department hotute'n Akashvani Aizawl a hrilh danin official-te rawtna hi ngaihtuah a ni a. March thla chawhnu lama state pahnih official-te inbe tura rawtna hi a taka chantir theih a ni dawn em tihah thutlukna an la siam lo ni-in an sawi a. Assembly inkhawm kal lai mek hi March ni 20 a tawp chauh tur a nih avangin hun a awm thei ang em tih an ngaihtuah mek thu an sawi a ni. Nikum August ni 9 a Aizawl a home minister Pu K. Sapdanga ho Mizoram aiawhte leh Assam border protection & development minister Pu Atul Bora kaihhruai Assam sorkar aiawhte inbiak tuma March ni 31, 2025 hma ngeiin Guwahati ah minister pahnihte'n inbiakna chhonzawm se ti a thu an dah chu tihpuitlin theih a ni dawn ta lo ni-in a lang a. Chuti chung chuan minister pahnihte inbiak hma hian official-te inbiak phawt hi Mizoram sorkar chuan a rawt a. March thla chhung hian official-te tal hi chu an inbe hman ang em tih a chiang thuai tura ngaih a ni.

Mizoram sorkar hian minister level-a inbiak hma hian an inbiakna tur atana kawng lo sial lawk a, ram inchuh chungchang hi state pahnih official-te'n chipchiar taka lo sawiho phawt ni se tih an rawt reng a. Assam sorkar lamin chhanna an rawn pek mai loh avangin inbiak hun a khawtlai ta niin home department hotute chuan an sawi a ni. Inbiakna hmasa berah Assam sorkar chuan Pu Atul Bora leh official dangte rawn tirin khatih lai a home minister Pu Lalchamlia kaihhruai Mizoram aiawhte nen August 2021 khan Aizawl-ah ramri chungchang inbiakna hmasa ber buatsaih a ni a. Hemi hnu hian sorkar hmasa hun lai khan Aizawl leh Guwahati-ah minister-te hi vawi khat ve ve inbe zui-in ZPM sorkar a lo pian hnu-ah nikum August thla khan Aizawlah minister 2-te an inbe leh a ni. CM hlui Pu Zoramthanga leh Assam CM Pu Himanta Biswa Sarma te pawh Delhi-ah vawi 2 an inbe tawh bawk.

<><><>

WINE, BEER

Sorkar chuan zu khapna dan siam danglam hret a, Mizoram thei leh thlai thar chhuah hmanga wine leh beer siam phalna ruahman a tum.

Akashvani Aizawl-in thu a dawn danin Mizorama zu khapna dan hman mek, Mizoram Liquor (Prohibition) Act, 2019 chu hemi lam hawi hian siamthat turin he dan siamthatna atan hian assembly secretariat-ah amendment bill thehlut a ni tawh a. March ni 6 khian he dan siamthat tura rawtna hi excise & narcotics minister Pu Lalnghinglova Hmar chuan a pulut dawn ni a thu dawn a ni. Chief minister Pu Lalduhoma chuan February ni 21 khan zu khapna dan hlip turin sorkarin hma a lak loh thu leh sawihona pawh a la awm loh thu assembly house-ah a sawi a. Wine leh

beer chungchangah zu khapna dan MLP Act siamthatna tur excise & narcotics minister-in a ruahman thu a sawi. Hemi chungchanga excise & narcotics department lam atanga thu dawn danin Mizorama thei, buh leh bal leh thlai thar chhuah atanga wine leh beer siamchhuah a nih theihna atan dan dinglai hi siamthat a her rem tum a ni.

Mizoram thar chhuahah hian grape chauh ni lo, balhla, lakhuihthei, sawhthing, dragon fruit, sapthei, Zobuh leh thil dang wine leh beer siam theihna ang chi atanga siam phalna atan dan hi siam that tum a ni a. Mizoram thar atang chauhva siam theih tura ruahman a ni a. Hei hian Mizoram pawna wine leh beer siam lakluh phalna a huam dawn lo a ni. Hetih lai hian horticulture minister Prof. Lalnilawma chuan Mizoram thei, buh leh bal leh thlai thar atanga ramdanga hralh chhuah (export) tlak tur wine siam chhuak tura ruahmanna an kalpui thu Zirtawpni khan a lo sawi tawh bawk a ni.

<><><>